

Anouk Eman nombra como e Embahador di Fundacion Autismo Aruba

ORANJESTAD (AAN) – Señora Delma Arends, presidente di Fundacion Autismo, a hiba palabra den conferencia di prensa relaciona cu e trabao conhunto cu e ministerionan di Asunto Social, Salud y Enseñanza ta realizando, pa avanza riba e tereno di Autismo di Aruba.

Señora Arends a duna di conocé cu Fundacion Autismo Aruba a drenta den contacto cu “Autism Speaks” algun aña pasa, pa medio di señor Van Eman ya cu Team Aruba ta sponsor “Autism Speaks South Carolina”.

E dama a subraya cu for di e momento ey Fundacion Autismo Aruba a haya un bon contacto cu e organizacion menciona.

Sra. Arends a indica cu “Autism Speaks” tin un programa global, cual ta encera cu nan ta analiza un problema local basa riba tres obhetivo:

Concientizacion

Mehoracion di e capacidad local

Cooperacion riba nivel científico

El a agrega cu tur e aspectonan aki ta pone énfasis riba e capacidad local. Kiermen, cu nan tin experticia pa haci analisis, pero nan ta guia nos mesun hendenan pa haci esaki.

Nan por duna sugerencia a base di e resultado di e analisis, pero nan expertonan ta bay entrena e hendenan local pa nan sigui duna training, entre otro na mayornan.

Esaki ta wordo teni na un forma sostenible pa garantiza cu e sistema ta funciona.

Sra. Dilma Arends a participa, recientemente, den un encuentro internacional cu “Autism Speaks” unda cu hopi pais cu tin experiencia eaba cu e programa di e organizacion aki, a participa.

A capa atencion di e participantenan cu, por ehemplo, na Peru tin un school pa adoltonan autista, unda nan ta wordo prepara pa drenta den e mercado laboral.


E personanan aki ta gana dos biaha un salario minimo, y e dunadornan di trabao ta gusta tuma nan den servicio pa algun motibo: na prome lugar pasobra nan no ta haci redashi; tambe pasobra nan ta gusta nan trabao y nan ta loyal y consistente.

Sra. Arends a expresa cu hasta pa esnan di “Autism Speaks” esaki tabata un “open eyes”. El a agrega cu Peru aworaki ta bay contribui cu e conocimiento cu nan tin na tur e otro miembronan afilia na “Autism Speaks” na mundo.

Un consejo cu a bin acerca tambe ta pa nombra miembronan di comunidad como embahador, y e miembronan di Fundacion Autismo a nombra e hoben Anouk Eman, hopi conoci pa su logronan riba tereno di landamento sincroniza den cual dos biaha a sali campeon pa Nacionnan Uni.

Ademas e mes tin famia cu autismo y ta sobrina di sr. Van Eman cu a drenta entre “Autism Speaks” y Fundacion Autismo.

Fuera di esey Anouk ta bay specializa riba autismo pa su Master Degree. Funda-



cion Autismo Aruba ta hopi gradici na dje cu e ta bay ta e cara di Aruba y e persona cu ta bay plama e mensahe pa Fundacion Autismo.

Fundacion Autismo Aruba a cera un compromiso cu gobierno cu nan ta bay genera e fondonan necesario mirando cu ta un cooperacion entre un NGO y Gobierno.

Nan no sa ainda cuanto e estudio ta bay costa, pero na momento cu e ehecutivonan di “Autism Speaks” bin Aruba y reuni cu e gruponan, nan lo tin un idea di esaki. Pero mientras tanto, e fundacion lo bin cu fundraisingnan necesario y pa logra esey lo mester di e colaboracion di henter nos comunidad.